

四庫全書

集部

欽定四庫全書

瑤石山人稿卷十

明 黎民表 撰

七言律詩

同陳公載登海印寺瑞光閣

燕京樓榭倚東風春日憑高感慨同
碧海多連大內紫臺山半枕離宮
平蕪縹緲沿江盡遠樹依微入望空
鄉國更傷千里目夕陽何處送飛鴻

燕京秋懷

北郭秋陰接九垓登臺一望倍傷魂
霜前砧杵千家動日落風塵萬里昏
天上已違攀鳳侶山中猶憶卧龍村
孤舟渺渺堪愁思恐入楓林有斷猿

廣寒宮殿帝城西錦石瑤沙玉作蹊
白鶴每依華表下紫鸞多藉碧梧棲
流雲宛轉通仙掖墜葉飄飄滿御堤
一自金輿巡歷後月中環珮冷淒淒

秋風嫋嫋吹邊塞轉餉千艘入濁河
白草漭連青海闊

黃塵秋暗黑山多運籌賴有蕭何畫息戰無煩魏絳和
聞道居庸虛將守邊庭今已悔干戈

萬木蕭森帶夕陽澄江偏使客心傷能文賈誼終投楚
作賦相如已倦梁勲業獨看青鬢在羽翰空羨碧霄長
滄江歲晚歸來好岸芷汀蘭尚有芳

旅感

周南留滯倍離憂京洛風塵自倦遊病裡看花如隔夢
春來臨水似驚秋黃金價重誰招駿白石歌殘獨飯牛

鄉土歲時渾不惡
速營三畝作菟裘

高臺遠望坐銷憂
病後依依感昔遊
貪客帝城如戀舊
計程鄉路已逢秋
人間幻夢唯蕉鹿
天上閒情有女牛
楚水越雲千萬里
北風零盡黑貂裘

萬歲殿

在朝天宮內

鬱鬱靈山守百神
宣皇曾此禮羣真
碧壇風度龍旂影
瑤草香銷鶴馭塵
青雀書來猶悵望
紫鸞簫罷更逡巡
玄關一閉無消息
華鳥年年怨早春

露勛廟

仙媛芳名齊日月
闕宮遺像鑲烟霞
明湖日鏡金鈿影
清露長涵寶曆花
颯颯靈風催苦竹
泠泠秋色淨蒹葭
可憐墮玉空山後
慙媿蛾眉學浣沙

阻風李陽驛

滿目川原百戰餘
旅情芳草共蕭疎
蒼山古堠逢秋騎
野水殘燈見夜漁
地近瀟湘多暮雨
鴈來湓浦少鄉書
故人憶我停雲外
惆悵烟波少定居

舟泊金川望唐允治歐彥禎不至

嶺雲關樹思依依江上初逢秋月輝
岐路無情還獨往青山有約更同歸
烟生古戍逢人少水落寒塘見雁稀
楚客此時頻悵望不知何處寄金徽

與公載子乾吉卿送泉翁北上返棹石門

杜若青青聞榜歌佳期南浦悵如何
風聲夜起潮侵岸天色平臨斗在波
威鳳漸知隨日輦冥鴻猶自避雲羅
扁舟渺渺堪乘興況聽袁郎雅詠多

營清泉精舍

幽棲遠愧王官谷脩禊誰誇內史亭青壁舊藏高士傳
草堂今映少微星茶烹石鼎分泉味井問丹砂識地靈
應是漁樵能混迹十年江漢任飄零

擬就壺觴開白社旋營瓜地向青門雲中鷄犬非忘世
徑裏桃花似避喧鶴在松間同佇立僧來石上共清言
經過舊是濠梁侶秋水無心與細論

陳貴吾歐彥楨約遊玉舄亭故址

弱水桑田更淺清殘碑猶自記嘉平青驪海上應無迹
玉爲人間尚有名笙管御風迴鶴夢杉松將雨雜鸞聲
那堪采藥歸來晚夜夜東風憶五城

春興次彥楨韻

和風助律景堪憐更有懽聲下遠天御宿花光承曉日
琳池月色帶春泉蒼龍東駕行陽令青鳥西來拂曙烟
南國山川勞望幸五陵佳氣自年年

午夜鏘鏘簇佩鑾金吾千隊敝長安欲求海客先祠竈

擬醮神君更築壇丹桂影中迴日御碧桃花下聳雲冠
侍臣聽罷鈞天曲銀浦無聲沉溼寒

絳氣迴連承露掌祥氛初拂相風旗杲恩影動旌旄轉
閣道陰生漏刻移豹尾日長唯近幸黿頭天遠更遙祠
腐儒旅食驚心地獨望寒雲動所思

九日和子乾登高韻

是日余以病不赴

錦樹團圓風滿林憑高多難易沾襟石門返照千家盡
磴道盤雲九曲深坐閱歲時傷短髻望連烽戍折遐心

蒼厓羨爾題詩處山月隨人下鶴岑

遊玄妙觀

為愛仙居隔市廛星君臺上共談玄坐來海水成清淺
歸去人間閱歲年竹院晚涼金碎瑣石幢秋淨玉嬋娟
追遊擬受長生訣不用遺文說五千

和梁公實無題

用李商隱韻

疎榆一夜動西風露脚斜飛桂殿東白玉鏡臺鴛被合
紫雲香駕鵲橋通鳳皇衫拆胸前錦蜥蜴砂殘臂上紅

何事人間不相見上陽宮裏怨飄蓬

燕京書事

河堤新築洞仙宮八駿經遊向此中
絳節拂雲遙駐鶴赤闌驅石已成虹
丹書見說曾親授紫府還聞有夢通
十里穗楊風日麗幾時軒馭過崆峒

日上蒼龍雪正消太清宮殿轉空寥
案前寶鼎斟明水仗外華燈燭慶宵
關塞只傳青海捷佩環空散紫宸朝
可憐方朔金門待聽得霓裳襍鳳簫

一夜瑤池集絳鸞
六花飛舞下雲端
蘭臺未許誇清冷
黃竹徒勞詠闕寒
爽氣蕭森連玉樹
曉光零亂拂銅盤
誰能和得陽春曲
長奉君王萬歲歡

西宮瑤草日芳菲
玲館春深碧浪圍
朱字署成華露濕
紫泥封進鶴羣飛
履隨虛步瞻依切
簾隔天顏笑語稀
不見平津開閣待
經旬休沐始言歸

朱樓迢遞接平沙
歎息深閨有麗華
青鳥幾時隨阿母
綵鸞今夜屬良家
桃栽碧海多成實
桂貯長門自落花

寄語采桑南陌女莫將顏色向人誇

早秋

一見秋風心已驚關河回望不勝情霧迷天上金莖影
月冷樓前玉笛聲歸興總銷塵土夢閒愁空對短長檠
杖藜更擬尋山去向待他年學尚平

送丁戊山人還閩中詩

并序

丁戊傳君風儀俊整天骨森立蚤肄丘墳涉九流之
相奧晚耽冥寂包八正之匡路故能遊心懸解宅美

希夷鵬運天池卑榆枋之斥鷃智遊玄水得罔象之
靈珠盧敖有遐舉之期齧缺無榮觀之願出入水火
吐納風雲日觀天門覲魯儒之遺址朱陵紫蓋搜姒
氏之奇文意在忘言行無轍迹以為善建不援玄關
難啓曹溪閤傳衣之迹浮丘乃梯仙之戶擔簦負笈
千里而遙度碣凌山九秋始至玄風所感聞者景從
挹叔度之波濤鄙吝斯遠見紫芝之眉宇塵俗盡銷
與旨冥筌迎刃而解繁文衆說有叩斯應大器不官

大巧不斷揚雄稱言若鳳孔子嘆其猶龍非斯人之
儔與但以蕭晨在感梓里長違臨霞增慨遡風攸往
禦寇以七日為期令威乃千年一返雖紫極黃庭曼
異人間之世而素絲歧路難捨區中之緣遙晤何時
遠心空絕寄言竹素佇埃微音

蚤從丹籙學神仙脫悟真乘了內篇杖有百錢行自得
居惟一榻坐皆穿尋山但可如康樂蹈海何須學魯連
臨別攬衣空戀戀幾時談笑復隨緣

木蘭江上動深秋千里誰憐汗漫遊
家共白雲天外遠身同明月海邊留
秦人望逐桃花水楚客悲生杜若洲
來本無機歸亦得不知何處是菟裘

同丁戊山人遊蒲澗寺

青蹊窈窕絕塵氛一派鈞天下界間
龍去不收千日雨鶴來還動滿蹊雲
山瓢祇獻長生酒石室應藏內景文
歸去幔亭何日到緘書先報武夷君

心遠亭探梅得霜字

京兆池亭萬樹芳半臨秋水半含霜
風林暗折玲瓏玉
雪徑遙聞斷續香
萼綠鮮知神女色
額黃曾識漢宮粧
江南地隔瑤臺遠
欲寄瑤枝思渺茫

登鎮海樓得憑字

歷盡丹梯第幾層
下臨千仞若無憑
石間細路縈紅葉
松頂寒花絡紫藤
遠目只隨芳草去
清歌長共碧雲凝
三山波浪空愁思
誰躡鴻鸞共上昇

和梁思伯宿寶陀寺

憐君獨泛靈洲水
永夜空門坐寂寥
雲起半從山上石
月明還長澗邊潮
芝傳隱訣行堪食
桂遇幽人或可招
遙想焚香誦經處
更尋支遁問逍遙

粵州草堂春日試筆得歌字

謝家賓從有羊何
春日池亭載酒過
紫氣直從燕闕迴
青山還繞粵城多
花霑瑞露低吟幌
鳥嘯芳林襍棹歌
聞道漢庭偏側席
未須長戀釣魚蓑

泰泉春遊得西字

雲峯一徑入幽棲，不信風光有讓西。
寒澗水喧知鹿下，遙林花動覺鶯啼。
亭前玉舄仙靈宅，洞裏金書太史題。
歡賞日斜猶未洽，更携賓從過文溪。

大司馬鐵橋先生矩洲雅集得青字

獨樂園深畫掩扃，追趨今喜覩儀形。
勲名北闕高卿月，賓從南州聚德星。
鸞鶴每依霞外詠，魚龍長似鏡中聽。
石虹湖上春應蚤，豐草崇蘭滿眼青。

贈易道人

塵滓脩然不受侵轉蓬無復憶家林路窮西極流沙遠
身犯南方毒霧深青竹一枝常在手丹經千卷不傳心
亦知羝化終騰去白石蒼蒼何處尋

登五仙觀通明閣

目盡寥天草樹平片帆經處是東瀛烟銷甓社珠浮出
雲擁森臺玉作成遠浦迥含蘭芷思陰風初度雁鴻聲
飛仙御鶴何時去塵海冥冥笑此生

和公實燕臺感秋

紫塞霜飄雁影孤
荒臺斜日下平蕪
秦封隴華皆歸馬
禹貢山川盡剖符
一代彛章宗典雅
百年風俗落虛無
腐儒策蹇蓬蒿裏
空憶文皇起壯圖

楚客思君賦澧蘭
關山迢遞夢來難
風前白鴈飛飛遠
霜後丹楓落落寒
碣館三秋愁桂玉
鄉書千里比琅玕
蓬茆自是烟霄隔
惆悵無因附短翰

桑乾千折抱燕臺
豈謂天驕飲馬來
兵氣旋銷烏鳥樂
陣雲初散鼓鼙哀
一時猛將多蟬冕
三黜儒生尚草萊

卧病衡門秋又晚幾時東閣待重開

歲月升沉銷壯心髭毛無那百憂侵
炎方祇重龍香價燕市徒捐駿骨金
草木凋傷催暮景風烟蕭索變層陰
黃花爛熳增愁思安得瓊枝共醉吟

文園遙憶病相如幾度裁詩慰索居
西第看花搖綵筆上林遊獵從金輿
生逢堯舜功名薄迹混漁樵計術疎
聞道乞身書欲上聖明應未許懸車

旅食燕臺幾變秋才名應媿後時流
雁來又值寒砧急

霜落偏驚木葉凋，滄海烽烟猶濺淚。
杜陵花竹未銷憂，長安正在浮雲外。
不為相思重倚樓。

讀圓覺經

中歲驅馳困一經，媿無鯨力破滄溟。
閒思種樹為農圃，病學餐煙養性靈。
身在塵埃如瞥電，髻緣愁緒劇繁星。
年來悟得空王理，止慾除嗔是戒銘。

秋日同諸賢遊矩洲

謝公幽興在雲霄，別墅追尋豈憚遙。
芳柳曲盤深淺水，

畫船輕送往來潮
機心息盡鷗還下
藻思飛時鶴共飄
記取臨霞懽賞地
後來烟月轉空寥

鄧君肅貽菊

窮愁九日偏蕭索
別館清秋祇益悲
赤葉已隨風外落
絳苞還向雨中移
不嫌霜露侵蓬鬢
為愛馨香入酒卮
素手折來憐汝意
金莖噙望渺余思

同傅木虛劉安元童仲良遊五仙觀

玉京琳殿海東湄
上客琴尊得共移
仙隱已經羊化後

吏情休歎鳳衰時
池空半落流雲影
松古偏餘積雪枝
應是丹臺曾籍記
喜於蓮社結幽期

丁戌山人招飲旅館

栢酒椒盤已薦辛
天涯憐爾獨逢辰
菩提為覓西來種
榆柳重經嶺外春
風雨幾番還秉燭
路岐千里定沾巾
干戈此日復滿眼
何處飄飄寄此身

丁戌山人謁先君墓有述畬

蟬曳疎枝鶴繞林
攀號應廢蓼莪吟
生芻不負南州約

寶劍多勤上國心
指佞尚餘階下草
將歸空有壁間琴
平原舊客無人在
今日因君淚滿襟

太岳仙宮七詠

太和

山勢盤盤壓厚坤
宸居奕奕位天門
龍蟠近接三秦勝
黿負遙連五岳尊
丹磴參差懸鐵鎖
玉京璀璨湧金輪
乘麟散髮遊何處
直以昇平報紫元

五龍

紫蓋峯前下鶴羣羽衣遙挹御爐熏雲呈瑞像雙鬟玉
帝賜霞裾五色紋星亂石枰當澗隱風迴金磬隔山聞
蟄龍一去無消息悵望經臺日又曛

南巖

七十名區衛紫宮南巖幽勝若為通亭亭仙掌溥清露
葉葉靈衣御曉風山下烟霞常覆鼎壁間文字半垂虹
歌厓可卜無人買洗鉢焚香事遠公

紫霄

軫翼光芒夜夜垂洞霄峯勢入雲危窓間下辨金銀氣
地底潛通日月池玄水當年非禹跡赤松今日是堯師
祇應上界無人到輸與祠官種紫芝

玉虛

目斷仙山豈易逢紫岩回首有苔封三株暗結黃金粟
九渡深盤白玉淙蕙帳別來驚夜鶴琅璈歸去御時龍
茂陵自是秋風客腸斷青驪海上蹤

遇真

手把丹書侍玉宸紫髯蕭灑出風塵青羊化後猶存石
白鶴歸來尚幻身藥市當年曾隱姓花源今日正迷津
可憐物色先朝事應為蒼生訪隱淪

淨樂

綺寮珠綴冠丹丘翳鳳驟鸞在上頭窻外月明秦樹迥
檻前風急楚江流天門險澁疑無路地籟淒清直似秋
不是文皇親指畫相樊安得翠華遊

朝天宮追和喬太宰諸名賢韻

竹宮松栝畫陰陰時有鸞驂下翠岑
檢玉舊傳三殿秘飛章遙向五雲深
仙都不與浮塵變浩劫多愁短髻侵
疑是上霄同謫客幾回清夢得披尋

鋪金積翠寫神州羽景還開洞壑幽
馳道屢經清蹕過侍臣常奉屬車遊
飛光直射蓬萊闕霽月猶懸翡翠樓
自是丹丘人代裏却從東海說瀛洲

吳而待候選已久輒詩往訊

久待公車未擬回清時難復卧蒿萊
穰侯本忌縱橫客

枚叔虛稱扈從才盡日悲風傳旅鴈到江春色落殘梅
飄零別我青山去誰共天涯竹葉杯

松岩為鈕鍊師賦

愛汝結室長松陰白鶴青猿知隱心丹臺窈窕丘壑靜
紫芝璀璨烟雲深月朗似聞木客嘯風起恍聽蒼虬吟
人間埃世不可住安得枕流清俗襟

飲錢徐比部宅時吳舍人李比部同集

燕京楊柳花飛日一上春臺望苑牆詞客喜同金馬署

歸心遙滯白雲鄉
鴻疎嶺嶠音書斷
騎遠關山別路長
拚醉此宵應不惜
衆人空自隔殊方

征驂欲戒暫徘徊
極目風烟慘不開
白社別來頻有夢
青山歸去獨無媒
遙祠應待河東蓋
作賦多逢鄴下才
誰向天涯慰寥落
封書須為朔鴻裁

鎮海樓登望

朱甍畫棟逼星河
秋色蒼然隱薜蘿
地轉青山開越井
天懸流水下牂牁
憑欄漸覺清商變
顧影其如白髮何

鴈有懷成悵望浮雲西北晚來多

童太史仲良席上邂逅方太守禹績即有詩見貽

奉答一首

駿足登臺衆所稱一麾江漢忌能聲
明時並數鄒枚賦末路誰收李杜名
赤日夢懸鵷鷺署青山家住鳳皇城
風流郡閣猶如昨麗藻應深下榻情

別潘少承之京

汀洲渺渺愴離情塞鴈隨人又北征
燕地樓臺雲外聳

秦淮花柳日邊明才華狗監應知己家世河陽舊擅名
此去君門還咫尺不須回首越王城

送何東莞之任江寧

三年坐嘯遠人安又綰銅章入禁垣秦地山河歸內史
漢家星象應郎官草青夢渚懸帆度日落關門倚劔看
此去公卿求識面無因停棹采芳蘭

同公實思伯遊北郭諸山

澄江一道抱城廻霽後丹梯四望開百粵地形雲外出

五陵王氣日邊來殘春風景空回首故國河山謾舉杯
留滯莫傷生白髮漢庭今待子虛才

同公載公實思伯登白雲最高頂

青谿千仞出塵氛振錫還驚虎豹羣遊客屢窺丹檢字
高僧多卧石樓雲風生大壑諸峯應澗落平田衆水分
招隱卜居原此地重來休勒北山文

千巖雲氣混重溟竹院松扉白晝扃金錫乍飛遊鶴去
貝書初誦毒龍聽荒臺花雨空留碧陰洞苔文尚帶青

浮世始知無住著長生還欲問仙靈

滄涼初日上雲樓金地應悲露草秋龍象豈知千仞換
江山虛道百年遊岩前散髮思高卧石上看梅得暫留
為道遠公能結社東林歲晚一相求

安期岩

絕磴陰陰松栝圍仙宮寂寞見霓衣曾傳海上青驄去
謾道山中白鶴歸霞起遠分丹洞色日生初弄石門暉
浮雲變化成今古誰似凌空一鳥飛

陳公聘憲使提五州兵征海寇有作次韻

吳城遙望雪初殘，又領奇兵過瘴灘。
龍節夜馳霜月暗，鸞旗陰曳海風寒。
關山應歎辭家遠，恩遇方知報主難。
預喜銑歌歸有日，封章湏獻五雲端。

牙璋十月下江城，百萬軍儲計不輕。
推轂屢頒明主詔，臨歧先慰遠人情。
梅花競落來時路，草色初青戰後坪。
聞道廟廊虛席待，肯論鄉國念歸程。

立春

倦遊寧復走風塵一卧丘園值早春
滄海烽煙連百粵關門雲氣引三秦
江湖歲晚憐飄泊松竹年來事隱淪
幸有習池供逸興願隨南畝狎芳辰

嬉春曲陳公載索和用韻

東風紫陌走驂騑何似咸陽縱冶遊
校獵忽經平樂館鬪雞還過富平侯
霓裳寫月初停拍綺閣臨春盡上鉤
愁極杜陵惟謾興新蒲細柳滿河洲

芳草春陰垂釣磯寒城斜日閃朱旗
熏人欲醉憐花氣

送客無情是柳絲
畫幟迴隨蘭浦入
金尊還傍竹陰移
江湖十載渾疎放
空愧青樓半額眉

秦技當年入漢京
緇塵曾逐麗人行
金鈿控月三千騎
寶帳臨風十二箏
西第將軍留盡醉
東鄰詞客寄多情
茂陵一卧長消渴
猶倚金盤望五城

三星的鐐露華光
宛轉歌聲逐女郎
沉水欲銷金鈿匣
曲璫初卷綉鴛鴦
風前調笑思捐珮
陌上含情問采桑
惟有揚雄疲執戟
年年空歎鬢絲長

和竹平山人見余庭前桃花

庭前桃花開不遲
堤邊明月復初宜
流鶯恰恰坐深樹
戲蝶紛紛穿短籬
映水紅粧仍綽約
臨風阜帽故傾欹
梁鴻更有揮毫思
好向芳菲倒接籬

寄王比部元美塞上

萬里烽烟接塞垣
西風立馬望中原
浮雲尚走陳琳檄
明月還開庾亮尊
青草北臨沙磧斷
黃河秋遶薊城翻
漢庭正是籌邊日
誰遣長纓到玉門

劉百魁叅軍脩貢京師事竣還成都

仗劍堪嗟行路難
春風一騎發長安
愁心萬里懸秦棧
壯志三年走漢冠
白髮自於官序拙
青山不改客途寒
相知已向文園卧
飛檄無勞父老看

天津同吳給舍舟中對月

獨驅羸馬出燕關
咫尺風雲敢自攀
明月共懸千里外
春陰不散五陵間
書生彩筆謀仍拙
諸將黃龍戰未還
何處忽來楊柳曲
滄江一夜髣毛斑

登直姑城樓

吳檣楚舵望中收
西北風烟接上游
海氣倒垂千嶂遠
燕關日抱五雲流
賈生封事餘雙淚
王粲思鄉自百憂
向夕蒼蒼州渚亂
斷鴻哀角不堪留

同徐中郎吳給事訪李使君郡齋

揖客龍門意未輕
北來風雨滯孤城
青山不盡檐帷色
濁酒深知傲吏情
豈謂漢庭疎汲黯
翻令東海重黃生
漫從華髮悲留滯
岳牧于今有大名

夏五日袁比部携酒訪舟中

燕京閭闔五雲開，袪服晨趨亦快哉。
萍水敢期仙客棹，榴花還及故人杯。
西曹詞賦留高步，東郭河山得雋才。
戎馬正當揮涕日，可無飛檄自天來。

同黃淳甫盛仲文余伯祥過天界寺常航竹館

東林曾有翠華遊，別院風驅萬竹秋。
經品舊從天竺至，禪棲應待許詢酬。
山開氣色皇居近，潮轉寒聲大地流。
依止空門猶未得，干戈遙動故鄉愁。

集何孔目元朗後亭

兵甲黃塵舊路非相携六月到山扉松間薜荔牽衣過
竹外鷓鴣挾子飛白髮尚淹金馬署青雲空羨綠荷衣
習池共把山公酒此日應拚酩酊歸

留別仲交伯祥

誰憐落魄游千里尚得長裾狎二豪時論共歸江左玉
賦才應折廣陵濤當壚夜倚花枝醉繞樹春吟野日高
白璧敢輕投贈意不堪秋雨夢蓬蒿

秋懷

高樓欲上思遲遲
關塞蕭條異昔時
草木風傳金氣盛
鼓鼙聲入朔雲悲
管寧東海歸何日
梅福吳門去不疑
白首烽烟重覽古
芙蓉萎絕曲江湄

王氣崢嶸終不改
建章宮殿倏為灰
瑤池青鳥猶頻降
渥水神駒未擬來
叢菊漸荒元亮病
汀蘭初歇楚纍哀
江天鴻雁冥冥去
極目神州首重迴

玉泉迢遞入昆池
百尺闌干俯碧漪
鏡纜雙維龍鳳舸

雕楹深鎖栢松枝侍臣鳴珮丹楓遠宮女臨霞彩袖垂
曾預都人誇盛事周南今日歎衰遲

舊京形勝鬱盤龍設險曾當百二重組練未收滄海甲
戈鋌猶起白門烽包荒茅服終須問竹箭空山豈盡供
蠹爾鯨鯢看掃滅屬車還擬待東封

三關羽檄似星流百萬戈船擁上游白晝峽深豺虎卧
青天磴絕旆旌愁孤軍銅柱空傳捷苦戰崑崙寔未休
宵旰此時憂不細征南諸將莫淹留

粵王雄據有離宮翠竹黃花輦路中五嶺山川餘霸氣
百年天地變華風滄波日落旌旗動白露秋高帳殿空
庾信江南休作賦漢家城闕正青葱

花木栽成帶遠垌北山孤絕寄幽亭漢陵歲月移滄海
秦壘風煙斷井陘十載棲遲生白髮何人推引上青冥
烟波絕把漁竿去虛擬江湖有客星

長安旅食歲蕭條金馬才人每見招一卧雲林淹彩筆
幾回霑灑望青霄玉山瓊樹風塵隔庾嶺梅花驛路遙

莫倚甘泉能獻賦衣冠今滿紫宸朝

石冷為潘新寧賦

憐君家住積金陽海樹層層出上方山倚洞天多翠削
窓窺禪月更清涼市喧不到松間枕瀑水遙添竹外觴
何事緇塵淹陸羽夢回泉石幾徜徉

壽歐母

會稽舊是梁鴻宅鄒邑今傳孟母家竹筍自能供白髮
橘林應得勝丹砂書傳南岳夫人鶴客問銀河織女槎

却愧荀陳交誼重年年來對壽筵花

雨中過噴玉巖

噴玉巖前山翠飛千絲披拂近人衣青林忽亂蛟龍雨
丹磴長連雪霰暉壺榼動隨高士履桔槔爭息丈人機
匡廬日暮何如此醉卧雲松未擬歸

尋烏利仙人舊跡

夢想仙人海上遊欲尋蹤跡莽林丘霓裳碧落飛何處
玉趾青山此暫留勾漏丹砂猶未就蓬萊雙鳥浪相求

峯前明月參差夜應載鸞笙過十洲

經山人李子長墓

墳前烏雀啄高枝過客能傳處士詩
食肉未為何點累
解醒終笑李倫癡
荒山鰥莖非違俗
流水浮名尚有碑
獨鶴不歸華表柱
麒麟高塚幾累累

重陽前一日過歐楨伯館因談西樵之勝示同舍
生

誰從雲路置丹梯海上諸峯盡覺低
殘雪不消天柱外

晴虹多挂竹林西
金書鎮日烟霞護
石髓何年澗谷迷
寄語尚平須負笈
琅玕千樹待幽棲

同黃幼章舍弟惟和惟仁集蘇給事宅

岳色風烟望轉賒
秋光偏在拾遺家
何人渴倚金莖露
此地霜停玉蕊花
楓葉亂飛江浦暗
鴈行遙入楚天斜
東山杖履能來往
應擬尊前醉孟嘉

山人艾從之為故司寇劉公求黃太史碑文事竣
還大庾

荷衣數片鶻為冠
廿載江湖雪髯寒
方術未應論薊子
交遊今獨有任安
關門紫氣閒能識
玉筍丹書老尚看
搖落此時無所贈
天涯相憶桂團團

大司寇劉公孫堯士來求黃太史碑文却還大庾
僕曾拜公於家食因附致哀輓之私

林泉不為蒼生起
隴兆俄驚白馬悲
淮海軍儲飛輓日
茂陵詞賦謝歸時
論功合上雲臺畫
紀實應存太史碑
玉樹傳家知不媿
生芻何處寄遐思

白鶴花

靈根五葉似雲屯，絕勝名當揜兔園。
玉羽向風偏皎潔，縞衣乘月正翩翻。
窺窓幾亂幽禽影，入夢那知粉蝶魂。
同是羅浮山下客，肯將零落怨黃昏。

送同年張叔顯之博白

桂海風烟遠國門，一官應喜近鄉園。
領垂素髮休言命，身致青雲合報恩。
仙客正逢勾漏令，居人猶指綠珠村。
桑麻種徧山城日，狗監能無薦至尊。

送何霽甫出守蒼梧

西風驛路遶黃花
桂水遙乘使者槎
騎省賦成年尚早
龍門聲重地偏華
坐省銅柱烽烟息
回望金莖氣色賒
漢室馮唐能為薦
肯令符竹久天涯

十五夜清泉山中待月

清光看欲上東林
何事風烟違賞心
竹外飛觴催急景
樓前雙杵變繁音
芳塵漸滿梁園席
爽思還披楚客襟
十載青山吾不負
浮雲端為破層陰

觀音閣同諸公登望

東林地僻少經遊，暇日追攀最上頭。
九月關山爭改色，一時風景自生愁。
藤蘿影合諸天暗，松桂聲長衆壑幽。
情為故鄉成徙倚，登臨休擬仲宣樓。

東山別業為梁少傅作

十里青山帶郭遙，風花三徑斷漁樵。
衣冠韋曲名家後，詞賦淮南隱士招。
對酒暝烟連竹墅，杖藜晴色過溪橋。
登臨更有羊何和，詩興逢秋未寂寥。

過公載浮丘得稀字

丹丘風日靜堪依
隱處猶存舊釣磯
金液已成仙令去
青山重到故人稀
雲移翠竹當堦亂
鳥挾霜蓬隔水飛
白髮漸驚秋色裏
相携須就芰荷衣

初冬過訶林淨隱方丈

雙峯晴雪隱禪枝
乘興難孤竹下期
龍象法從開士演
風幡言有化人知
曇花半落談經後
幽鳥潛窺出定時
籬菊肯同陶令醉
不勞廬岳遠尋師

薛卞二叅軍邀遊五仙觀

仙人樓殿雪初殘
松栢陰森繞玉闌
門外喜迎青竹騎
雲中遙聚白蓮冠
運籌畫省憐多暇
秉燭良宵得二難
賓從何緣留僻地
飛鳧先已候長安

別潘少承還鶴山舊隱

三載邀懽在竹林
扁舟還得似山陰
窮愁莫問潘安髩
久客應拚季子金
家寄漁樵歸路遠
興因烽火避人深
浮雲聚散知何處
草閣寒江送子心

黃幼章邀遊巢雲軒

何年招隱青山裏，水石依然對草堂。
桃谷已迷秦日月，蘭臺曾秘漢文章。
風泉千磴常飛雨，木葉三秋半帶霜。
惟有鹿門長接近，屢能乘興到雲房。

送吳肅還姑蘓

故園應念尺書催，一夜心隨北鴈迴。
碧草共迎南浦去，青山遙倚大湖開。
風塵寶劍誰持贈，江海瑤華待寄來。
流落轉驚春事晚，況逢花下有離杯。

秋日蘇黃門趙藩叅過清泉精舍得池字

門外何人復問奇偶尋芳徑獨移時薜蘿過雨飄山閣
松桂分陰到石池林下早拋朱紱貴尊前共指白雲期
榮名更欲投竿去多病深慙狗監知

答趙藩叅

衡門車馬喜相投高誼應憐水石幽珠浦波光搖遠樹
玉山雲氣過高樓笑移杖履同三徑悵望風烟恨九州
知為蒼生須強起林泉安得遂身謀

壽李都憲七十

十年匡濟屬垂衣六詔山川擁節歸
心繞赤墀隨日輦風行銅柱肅霜威
金鑾天上留詩卷黃石人間訪釣磯
松竹歲寒知不厭更看蘭玉在庭闈

顧玄緯見過山房次韵二首

誰擬南陽有卧廬蓬蒿三徑閉門居
祇緣好事能携酒應為窮愁獨著書
閑暑氣催鳴鳥變新涼風過落花餘
雲山政值邀懼日入洛才名信不虛

顧榮與陸機兄弟同入洛時人號為

三後

東陵今日學為園，片曝何心獻至尊。
謾有聲名傳谷口，空勞車騎訪夷門。
清冰銷夏沉朱李，涼月邀人倒玉尊。
自是羅浮堪吏隱，肯將名姓擬軒轅。

同林維喬山樓夜話

荒城擊柝坐清夜，微雨踈燈對濁醪。
三徑薜蘿同杖履，五陵烽火暗弓刀。
明堂君擬陳歌頌，岐路誰今感髩毛。
叢桂豈堪留客久，翻飛秋望彩雲高。



瑤石山人稿卷十

欽定四庫全書

集部

瑤石山人稿卷十一

詳校官監察御史_臣曹坦

中書_臣劉源溥覆勘

總校官編修_臣王燕緒

校對官中書_臣吳甸華

謄錄監生_臣周世芳

欽定四庫全書

瑤石山人稿卷十一

關

明 黎民表 撰

溫樹扶疎月轉明不眠烏鵲夜還驚
天圍翠殿澄沙色水合金塘墜葉聲
虎旅喧傳屯甲帳龍輿深駐在西清
九華燈影微微散碧落空歌半欲成

慶成宴賜昨

旭日流輝遍綺櫳九賓聲徹玉墀東
笙鏞奏格青壇外衮冕廻瞻翠幄中
牛酒賜酺霑萬戶虎鹽歸俎宴羣公
微臣亦預晞暘澤割炙何須比漢宮

送郭給事冊封代府

雲中關鎮地雄哉金冊親持遠道來諫草屢傳青瑣闥
使旌遙上白登臺九邊烽堠蓬飛斷十月河水馬蹴開
蘭阪桂叢雖可詠陰山還待勒銘才

萬壽節和吳舍人約卿

珠旗翠纛引祥烟銀燭光沉欲曙天象舞萬方連玉陛
雲韶千疊動金懸乘龍正向璿臺日鳴鳥應過洛邑年
却羨枚皋能獻賦幾回春酒醉宮筵

銅龍初闢曙雲開彩仗分行劔寫來日月旂常輝象魏

金銀樓殿駕蓬萊
風前鵲鵲翻珠綴
雲際仙人捧玉杯
魚藻正懽周室頌
栢梁休數漢庭才

十六夜無月同助甫作

悵望清光已不禁
沉沉宮闕轉生陰
雁鴻暗度千山色
戎馬秋懸萬國心
鄉思驟飛紅樹外
佳期空隔碧雲深
謝公不少南樓興
淒斷高城此夜砧

和舍弟惟和對雪作

飄花千片下蓬萊
瓊玖河山對面開
曙色遠從銀磧合

驚沙還向紫關來飛揚敢望青雲客歲月閒銷白玉杯
喜有集靈傳勝事陽春多是郢中裁

人日同舍弟惟和小飲

塞烽銷盡薊門天秦甸初開萬井烟彤管風雲書正月
紫宸車馬過新年窮愁柳色那堪折遠道梅花誰為傳
應是揚雄耽寂寞經時猶未獻甘泉

九日舍弟惟和自公署回共酌

故國山川烟霧深東籬忽憶醉行吟遲迴畫省含香日

悽切高樓望遠心
木落淮南空老大
花開漢苑幾登臨
深杯已索巡簷笑
金馬何須嘆陸沉

送客登毘盧閣

涼颼漠漠上層臺
四野風烟望轉開
碣石浮雲從海斷
雪山晴色過關來
病思鄉土依僧舍
老向朝廷論將才
十二碧闌俱倚遍
肯將搖落負深杯

送崔元伯使楚便道省覲

仙舟並載紫鸞書
負弩爭迎使者車
夢澤天寒蘭茝變

衡陽霜落雁鴻疎舳舻千里來包匭甲馬三邊賴積儲
庭畔斑衣雖可樂王程安得少踟躕

送思伯使金陵却回嶺南省覲

燕臺芳樹接吳天却指鄉園路八千華省舊知綸綍貴
青雲爭識世家賢庾關曉度梅迎雪楚岸春生筍入船
喻蜀未須誇父老題詩還醉竹林邊

大享

宮槐飄葉露初繁紫禁風來出絳幡池上仙班隨玉步

月中仙樂道金根九秋報禮皇家重三殿靈祈泰乙尊
遙想六龍回輦處百神深穆駐寒門

送吳進士子沐使遼左兼歸揭陽省覲

銅柱家山薄海氛歸心悽斷鳳樓雲飛芻遠向玄菟郡
按轡宵勤細柳軍白璧許身應不忝黃金招駿可能羣
風塵併舉傷春日斗酒那堪遠送君

雪夜同伯宗集繕部張肖甫宅得林字

北闕寒雲結暝陰龍山飛度正森沉可憐西第歌鐘滿

共把東曹酒琖深
柳絮忽邀詞客賦
椒花應折故園心
宵衣更從鳴珂去
玉樹青葱指上林

祈穀齋居

鈴索無聲樹色寒
集靈臺上拜千官
旌旗夜繞長楊陌
燈火春祠泰乙壇
煖入芳郊陽氣淺
月臨青閣曙光殘
揚雄白首玄經在
誰捧雲中玉露盤

同陳公載吳而待重遊朝天宮

松栝陰陰禁籞連
樓居高築佇神仙
入門鮮識金銀氣

披荔還開日月天
白髮飄零猶昨日
丹砂成就是何年
弱流自隔人間世
重到華胥亦可憐

歲除前一日同舍弟惟和過助甫

濁酒辛盤笑共看
天涯應念此宵殘
握蘭共接中朝彥
含菽無如故國歡
挾樹風霜隨臘盡
步簷星斗向人寒
陸沉正可甘吾拙
莫更裁書擬治安

贈洪山人從周

仙藥靈苗手自栽
乘風新向沃洲來
白紈細點鷺羣帖

青眼相看竹徑杯旅服久從京洛化
籬花秋隔故園開
黃金不在燕昭館千載休論國士才

從周移寓真如寺同張肖甫吳約卿過訪

懶曳長裾見五侯竹林尊酒日同遊
淨緣久託維摩詰
佳句兼酬帛道猷簷下鷄棲翻夕照
竹間蟬響度清秋
出門浩浩烟沙色悔別松風過虎丘

送許舍人稚幹使趙兼榮侍還靈寶

寒水欲盡渡滹沱千里梅花擁傳過
內史聲華高紫禁

才人詞賦滿漳河
莖臺北望烟花繞
關路西連金鼓多
莫向故園貪彩服
鳳皇池上待鳴珂

旅邸葺小齋作

欲卧滄江始願違
禁城新築類郊扉
哀遲通籍猶青瑣
多病貧居合翠微
靈藥長苗留客飯
野蘿垂蔓掛朝衣
菟裘更在雲山外
三徑將蕪可未歸

徐叅軍邀遊天壇徐道士館

青谿載酒共追尋
雲氣寥寥別院深
花覆綠蘿三徑轉

日移珠樹萬行陰
玉壺自隔人間世
白石同追物外吟
欲解朝簪猶未得
冷風聊借一披襟

清明日同肖甫郊遊

十里塵飛白玉堤
烟花何處使人迷
樓臺霽色宜春外
蘭蕙風光曲水西
鳴鐃草中驚雉落
引杯湖上聽鶯啼
青雲開閣憐遲暮
丹壑憑高欲杖藜

送王元靜之建安幕

元靜履吉之子

楊花飛盡撫春醪
擊筑相逢意自豪
官似潘安才未拙

賦傳枚叔調元高行趣蠻府初丹荔天入連江正雪濤
歸到竹林如借問風塵吾已倦青袍

鍾戶曹邀遊鄭園同肖甫作

鄭谷東連禁苑開文園多暇數能來夾池浪繞檀欒去
到岸風牽紫翠迴細柳烽烟猶駐馬上蘭歌舞且銜杯
陽春此日歸華省曲水新詞不易裁

同陳使君于舜酌肖甫宅

寂寂疎簾過雪餘寒燈相對省郎居紫貂可貫燕臺酒

紅燭仍停使者車
霜落禁中隨鴈斷
夜闌星斗揷簷虛
清歌緩舞休辭醉
江海憐君畏簡書

送姊夫黃廷寅任上饒文學

初拂塵冠拜玉除
青雲迢遞十年餘
循良世業黃公傳
經學儒林戴氏書
璧水衣襟爭奉席
金臺風雪正驅車
錦囊佳句休輕擲
漢室詞人薦子虛

答張肖甫訊余卧病

落木寒砧不可聞
山川蕭索夜平分
故人顏色看明月

倦客心情在白雲滄海終懷鴻雁計赤霄新起鳳凰羣
何人不奏甘泉賦寂寞蓬蒿始見君

送張助甫之南都

拜手朝辭畫省香朱衣持節下南方雲中舊隱三花樹
臺上今栖兩鳳凰詞賦寧知園令薄金貂還接上公行
離心不共江流遠矯首青雲總未央

當年龍變起輿圖弓劍千秋在鼎湖玉座春風花自落
鐵衣明月夜常趨九關烽火連魚鱗七萃戎臣盡虎符

何事南方勞肝食丈夫還憶射桑弧

朝來委佩下彤墀鵠沼麟園席更移江上歌聲翻玉樹
湖中雲氣導金支六朝壁壘猶天險萬里梯航自聖時
舉目風烟情併切一尊歧路聲吾私

腰裏千金獨上臺衣冠今有洛陽才三都文賦誰爭長
六代豪華爾復開草閣青春鳴翡翠滄江白日鬪風雷
誰論月夜征西將曾與袁郎共載迴

送張肖甫謫陳州

車騎西遊不可攀送君明日大行山
宦情翫驕風塵外
交態悲涼反覆間書卷空留青瑣闥
履聲初下紫宸班
報恩亦有夷門客莫擬梁鴻出漢關

花時携手鳳凰樓半醉曾披紫綺裘
詞賦肯緣楊得意
俠遊爭倚大長秋蛾眉自有傍人妬
駿馬今無國士求
不獨送君悲謫宦拂衣吾欲卧滄洲

三年執戟已蹉跎形勝能無雪涕過
二室烟花朝紫禁
五陵襟帶繞黃河相如賦豈遊梁倦
平子愁從拙宦多

江海一麾良足慰勒名麟閣待如何

清秋搖珮下蓬萊背指黃金萬里臺
嵩洛山川原墨食北邙歌舞化塵埃
衣冠不少青雲客州縣何勞白雪才
淪落古今同一嘆賈生祠下獨興哀

答吳明卿登梁城見寄

梁園風日值高秋楚客心悲獨上樓
遠道莫傳青玉案故人偏解紫貂裘
層城畫角塵沙起四野清砧草木愁
何事馬卿遊已倦只緣詞賦尚淹留

和張肖甫夜宿蘇門山同雪簑道人夜談

清秋形勝百泉開不是湘潭楚客來日抱黃河明九曲
星從中岳動三台山前夜色留真侶谷口天晴出怒雷
不見孫登長嘯處浮雲今古意堪哀

同文壽承李伯承郭次甫吳約卿夜集思伯館得

陽字

竹逕縈縈霞石光短檠分照薜蘿長飲中草聖惟吳苑
坐上才人擬栢梁玉手持觴娛永夜黃花留艷過重陽

風塵自有滄洲興不嘆飄蓬在異鄉

郭次甫移寓姚元白館過訊

手把青藜誦遠游
薜蘿為帶鹿為裘
別來天姥山中雪
歸去安期海上舟
關外千言猶可授
桑間三宿為誰留
金陵市隱元相逐
好向長安作醉侯

徐子與至都下同梁思伯過訪得寒字

綈袍猶接故人懽
尊酒同揮雨雪寒
草積射堂初解罷
花明燕闕復彈冠
交游漸覺青雲盡
世路從知白首難

畫省願君還並入烽塵今已靜桑乾

臘後同次甫思伯過子與得來字

烽烟何意故人來握手同登郭隗臺北闕風雲雙劍在
西山蒼翠兩眸開待攀玉樹成詞賦且對椒花頌酒杯
聞道賜金多計吏周南留滯獨稱才

祇事闕下逢李伯承有作

東風吹雪淨芳塵丹地相逢有故人寒壓苑牆霞綺散
氣浮宮樹霽華新中朝綴履多奇士兩省分曹實近臣

日影漸移封事少叨從西掖聽陽春

殘臘同姚元白郭次甫梁思伯顧汝和過子與

北來裘馬苦風塵一卧長安值早春
垂翅雲霄成倦客淹情丘壑羨時人
梅花遠道心應折濁酒他鄉意倍真
白髮過逢知不厭栢梁歌頌幾回新

立春後五日同元白次甫思伯汝和過子與得車

字

星迴燕闕此停車尊酒相携散直廬
銀燭淹留迷夜雪

玉盤真率剪春蔬
烟花萬國元正會
雲物重臺太史書
寂寞相如猶卧病
抽毫誰奉紫宸居

省中對雪

燭龍銜景照神京
佳氣籠蔥拂五城
色混瓊波沉太液
爽分銀闕入西清
漢宮彩勝裁花就
楚客幽蘭擬賦成
華省追趨慙筆札
幾回消渴望金莖

雪後省中聽簷溜作

建章宮沼已流澌
冰柱初消滴漸微
臺上虛搖神女佩

苑邊輕濕侍臣衣金銀色近臨仙掌宮羽聲長出鳳闈
三載鈞天聽舜樂只疑身在竹間扉

送陸大理使江北暫還洛中

雙旌指日入河陽嵩洛雲山是故鄉郎署遭逢身未晚
江湖風雪髯徒蒼恩加繡斧光輝遠醉別黃花驛路長
藂桂莫淹淮水騎聖明垂意在南方

送徐子與補汝南太守

鳴笳伐鼓渡桑乾不是關山叱馭難明月共懸金虎去

春風猶射紫貂寒中原回首分龍劍河曲裁詩隔露盤
寄謝夷門車騎客陸沉方朔在長安

新鷺南陌酒初携明日梁園又杖藜芳草喚愁千里隔
楊花如雪五陵迷漸經河岳寒星斗忽漫乾坤入鼓鼙
三月風光人共惜與君揮手鳳樓西

送魏順甫補濟南太守

單車東去入齊州虎竹新承帝命優百二山河元壯觀
五陵冠蓋昔豪遊關心遼左登陴日騁望瑯琊縱獵秋

却愧繞朝無所贈前籌深待富民侯

佛日擬遊西山不果次甫竟申獨往賦此寄之

三山曾記手曾携步壑穿林自不迷茗椀香花隨佛供
白雲流水問禪棲氣冥瀚海千岩暮天入中原萬象低
丹屐十年遊歷遍錦帆龍舸夢湖西

懸梯千仞俯層巒松枯陰森夏亦寒玄岳烟塵浮大陸
玉泉流水散桑乾罡風上擊飛鳧遠丹壑重臨借杖難
岩下陰書終可遇一龕燈火待來省

和顧汝和玉河見白燕

杏花桃葉盡芳菲
曲水春風半掩扉
玉羽乍窺池上影
霓裳如舞月中衣
畫梁多是無心繞
金屋誰同作伴飛
回首鳳笙雲路杳
雕籠爭道不如歸

曾是烏衣國裏身
玉樓瓊樹換丰神
雙飛剪出機中素
獨立妝成掌上人
月下步搖花有態
水邊飄動襪生塵
梁園詞客難成賦
洛浦相逢總未真

送內姪梁少熙萬戶南歸

相門千載尚稱良
况復清標接鴈行
恩澤舊封存虎觀
樓船新渥拜龍驤
斑衣且遂南枝暖
駿足先馳北海霜
海上風烟煩一箭
薦言爭借老馮唐

送陳師孔姻丈大叅蜀藩

萬里驅馳戀闕情
璽書重下鳳皇城
明時好布青雲澤
遠海先傳白雪聲
星旆影搖金馬去
江花秋擁玉麟行
徵求正賴前籌日
賢頌能兼化蜀名

朱大行仲南招飲姑氏園得星字

碧梧叢菊晚熒熒別有風光在曲亭醉後徵歌憐白雪
燈前邀客看青萍高城夜色翻霜樹西掖寒雲隱曙星
詞客當筵俱郢調不知王粲感飄零

送龐侍御少南按河南

桃李吹香入夾城東風沾酒聽啼鶯豺狼遠遁都亭肅
龍馬來遊洛水清上苑有書曾諫獵河湟多事要談兵
雲山不是邀懽日難折三花一寄聲

九日同顧內翰汝由兄弟登丹冲臺

雕闌曲曲帶層城下有瑤波百尺清芳桂遠搖粧鏡影
紫苔深斷屨廊聲驚心歲月三秋盡極目河山萬里平
綵筆幾回誇羽獵登高今日賦還成

清虛殿

元故宮前有監戒亭

珠樓翠殿劫灰餘山勢盤盤上碧虛洞壑曉生雲氣濕
桂松秋滴露華疎銀河影落蒼龍沼金埒花迷紫鳳裾
瑞靄輕烟搏不散祈靈方此駐鸞車

同王儀甫酌醉後賦此

紅塵踪跡自蕭疎風雪誰停過客車
俠氣未能忘擊筑酒狂那復記尚書
七言不數題詩列六百應慙賜俸餘
同病王郎最相惜綠羅中夜舞長裾

送朱從事之建寧兼訊吳明卿

閩海風烟黯不收南行應借幕中籌
五陵花柳臨歧別九曲溪山盡意遊
阮瑀有才堪管記異公為政本風流
揮毫想在幔亭裏好奏賓雲為我留

春日同許元復顧汝由兄弟遊白雲觀

萬行珠樹接丹丘白日曾傳駕彩虬
犬已隨金節去衣冠不見翠華遊
人間陵谷成千載劫外乾坤自十洲
行客只貪風景樂豈知芳草易生愁

歐楨伯自嶺南至止宿借樹軒

烽塵天外嘆離居握手驚看萬里餘
步入梁園看雪日來逢宣室禮神初
多情不厭尊前舞小摘應憐雨後蔬
金馬陸沉吾自老漢皇停輦問相如

和胡督學伯賢旅邸對月見寄

車馬遙從宛洛來，又携清賞上燕臺。
南溟烽火侵雲出，北闕寒光冒雪開。
留滯金門慙報主，艱危麟閣正須才。
天涯欲寫思鄉恨，清夜南樓許重陪。

吳侍御約卿訪楨伯留酌得書字

故人遠道赴公車，詞客相逢下直廬。
河朔烽烟頻對酒，上林遊獵久無書。
寒星近睇雙龍外，羽檄頻驚萬里餘。
京洛過從誰健在，夜闌歌舞莫踟蹰。

楨伯以泰泉先生夢遊羅浮之作見示，依韻寄上。

曾事蓬萊洞裏仙
風塵回首隔鈞天
燒丹竈冷殘金薤
洗藥池荒長碧蓮
潮水別來猶到海
山庭歸去欲馳烟
瑤臺東畔茆廬在
小住桃花五百年

送吳子充還金陵

藜杖欲歸滄海上
鄉心先繞白門前
采芝未必終忘漢
炊桂誰能久客燕
蓬徑壺觴携二仲
春江花月剩千篇
甘泉不是無人薦
猿鶴驚心又一年

送伯承之亳州

紫垣朝夕侍龍旒，濠上今為握節遊。
雙闕夢迴秦樹遠，八公雲蓋楚山秋。
淮南卧治人稱屈，宣室求賢爾最優。
此去遺蹤多吏隱，桂枝岩畔且淹留。

送岑司理允穆之池州

珂馬東風出漢關，故人尊酒共追攀。
冰心夜繞雙龍闕，黛色秋開九子山。
揮羽况憐烽火靜，登樓多是簿書閒。
玄成世業青雲上，簪筆長楊待早還。

過范山人雙塔寺旅舍

赤日風驅九陌塵，禪房揮麈待幽人。
坐憐白鳥下雙樹，不見繁華過一春。
燕酒味濃誇薏苡，越鄉心斷有鱸蓴。
榮途煩劫難除却，何似雲門息此身。

同吳顧二僚長歐顧二文學過沈鴻臚宅觀牡丹
春盡平陽戚里家，風迴金埒故歌斜。
隋宮剪作千叢錦，洛浦看成一片霞。
遊女明妝同拾翠，侍臣沉醉幾攀花。
朦朧月色人歸去，赤壁相逢俠路車。

省中芍藥

綺檻藂花何日栽芬芳初逐艷陽迴塵銷戶閣雲承輦
風靜莖臺露滿杯唾碧恍疑天女散含香應待漢臣裁
上林本自多奇樹扶荔誰移遠地來

答傅山人木虛

白鶴孤飛何處來封書猶憶朗陵杯衰遲我愧彈冠出
烽火君能策杖回海上青驪迷去路天邊金粟斷層臺
石田茆屋不歸去鳳管鸞笙亦可哀

舍弟將使西粵鄭駕部携酒偕楨伯見過

停雲欲賦意躊躇况復分襟萬里餘夢寐幾年搖碧海
星辰三殿識金輿情多故舊能携酒心折風塵懶上書
天路驅馳俱駿足莫因留滯念相如

送胡兵憲伯賢赴滇中

鳳起真從七洞天又持旌節向南滇才名宣室方前席
籌策秦中未乏賢遠檄正迎金馬使清詞不賦夜郎篇
莫愁萬里浮雲隔矯首扶桑是日邊

寄呂肇慶仁甫

李郭仙舟昔見同，別來三度值秋鴻。
淹留冀北浮雲異，夢想嵩臺落月空。
漲海幾回頻奏捷，將軍終自不言功。
丹砂早晚尋勾漏，短榻相從擬蓋公。

和姚鴻臚得告志喜

含香三載侍金鑾，為憶鱸魚不覺慙。
仙仗乍辭鵷鷺序，主恩還着鷁鷁冠。
題詩舊蒲垂蘿石，載酒重尋種藥欄。
同是滯留君獨去，綈袍能復念長安。

約卿宅同楨伯咏荷花得吟字

消渴閑思過竹林碧雲依砌晝陰陰琳池寫出成雙影
玉井移來有十尋倚曲似能翻翠袖臨風還解助清吟
當筵共是蓬山客肯嘆仙源隔水深

壽王霸州待詔道甫之父

襄漢風流勝習家歸來三徑始栽花雲中忽下青鸞使
關外懽逢白鹿車新捧玉書從北闕遠擎金醴自東華
芝蘭一一皆仙籍不羨方平燕絳霞

送許右史殿卿之河南

三年歸攬桂叢枝前席承恩再召時
歷下書成人鮮頌
上林名重主偏知琴尊漸遠金莖色
巾舄遙尋玉女祠
不是關東勞旰食平臺吟望肯相思

和殿卿留別韻

涼風落葉大河濱送遠傷魂似暮春
梁苑題詩為上客
嵩山扶杖待幽人銅駝一別衣冠盛
金馬重逢世事新
君去曳裾還得計滯留俱是嘆緇塵

秋日過吳侍御約卿同文壽承許殿卿集

一滯長安未擬回
蔣公三徑數能來
殘花向客猶生色
明月留人故舉杯
清夜譙遊追鄴下
高秋雲氣滿蓬萊
飄零騎省雖多思
懷抱能無此日開

戴金吾伯常招飲鄭園

禁城秋色淨無烟
碧水澄波帶遠天
十里樓臺通泰時
五陵花木有平泉
風搖柳浪低紈扇
日暮菱歌起釣船
水簾疎簾銷暑地
流塵知不到尊前

經南城飛虹橋

萬樹繁花出苑牆，彩雲如繞漢宮傍。
金塘漸落魚鳬水，綺井先飛菡萏霜。
銅雀望思連鳳闕，白狼歸狩自龍荒。
翠華珠履曾遊地，一半黃山下夕陽。

萬壽聖節肅事大高玄殿恩賚白金文幣恭賦

燎火香烟上紫微，鬱羅天外敞瓊扉。
虹文夜抱芝壇下，海水心從玉几歸。
宿雨乍消清禁籞，喬雲初散拂朝衣。
甘泉侍從何多幸，三拜黃封出瑣闥。

十七夜何太僕盧方伯歐文學素節推過集

江海離心已十霜
銜杯那意在他鄉
風塵不斷函關氣
衣履頻趨漢殿香
永夜星河臨桂浦
高城鐘漏隱長楊
仙郎彩筆誰能似
聞道卿雲有和章

秋夜曹有卿余德甫劉仲恭吳約卿見過得樓字
漢苑烟花望不迷
停車還為訪幽棲
秋殘河漢雙鴻斷
霜肅關山萬騎嘶
露下金盤誰共倚
尊前龍劍故相携
江南封事頻頻上
十載乾坤厭鼓鼙

劉仲恭姚元白吳約卿昆盧閣送余德甫

憶曾揮麈對雙峰
尊酒還於此地逢
漲海孤懸千里戍
霜天晴落五陵鍾
浮生轉覺空門是
世事多因白髮慵
芳草豈堪重戀賞
故人為別暫從容

九日同李給事馮吳二侍御歐文學登城南樓得

天字

魚鑰重關鎮薊垓
河山橫在赤闌前
愁中白鴈經千里
客邸丹楓有六年
玄朔烽塵秋入塞
紫垣宮闕上侵天
凌雲更接詞人賦
不數蘭臺白雪篇

送黃定甫還廣陵

未有詞人薄子虛拂衣歸待漢公車
家園舊倚金銀閣
文苑曾開水竹居
送客薜蘿經海盡
避風鴻鴈入淮疎
風塵悵望焦先洞
能卜歌厓為結廬

送朱侍御仲南使淮揚

華菊秋燈照夜闌
平明車騎發長安
借籌實控徐關險
轉餉還襟楚甸寬
披瀝正煩鹽鐵議
冰霜不愧惠文冠
曲江更接賓遊盛
樓閣金銀起壯觀

奉答用晦

三江晴色起飛鴻
芳訊遙傳自楚宮
紫氣獨看南斗外
陽春多在郢樓中
薄遊豈有裾堪曳
上客多慙瑟未工
湖海一身從此去
澧蘭吟望思無窮

送胡翰林懋中冊封襄府

回望金莖雪色間
南行旌節入昭關
長楊羽獵停車待
錦里江山策駟還
風射紫貂憐遠道
月臨青雀夢朝班
詞人已在麟臺上
招隱無勞賦小山

癸亥十月書事

遼陽碣石枕居庸天府元稱百二重豈少衣冠扶帝輦
坐令城闕起邊烽投簪敢謂滄洲近鳴劍多慙白髮慵
早晚單于須款塞玉門何用一九封

宵嚴羽衛聽宣麻細柳巡行衆不譁朔氣九關屯虎旅
軍聲千里震龍沙河山自昔雄三輔吳越于今總一家
何事受降仍未築白頭揮淚坐聞笳

漢家本自惜天驕飲馬年來到渭橋五夜將星明玉帳

七陵王氣上丹霄軍中選士皆穿札幕府謀臣盡賜貂
扈閣儒生慙獻賦燕然終擬勒岧峩

甘泉羽檄似流星飛將威應震北庭蟣虱已聞生介冑
貔貅猶未請灰釘中天日月懸雙闕三殿風雲擁萬靈
屬國淺才還一試豈能垂老事玄經

寄懷曾工部以三直省

憐君倬值度寒霄予亦嚴趨紫閣朝梁月共傳芳訊遠
關城空掩玉人遙星從左掖臨青瑣雲自西宮散綺寮

誰道鳳池纔咫尺休文愁卧已魂銷

送陳侍御道襄按閩中

繡斧朝持出未央梅花東指客途長
論交十載曾同舍把酒三秋忽異鄉
離袂已搖燕市月按章先肅晉陵霜
腐儒竊侍雲臺議願罷南征事朔方

齋居後過楨伯旅館得何字

晨趨建禮聽鳴珂又到幽居訪薜蘿
鳳吹忽從雍時下鴈聲還向露寒過
省郎遇主年垂暮客舍逢辰恨轉多

遙想侍臣扶玉几更衣應問夜如何

寄輓傅木虛

金液將成劍忽亡楚騷何處問蒼蒼
病來玄晏書猶著歸後黔婁室盡荒
空擬延陵題姓字誰將江左卜行藏
浮生竟未忘情得目斷虹橋灑淚行

送方憲使定之飭兵饒州

百戰潢池未解兵廟堂流涕問蒼生
誰當漢將登壇日兼有文園作賦名
巨舳近聯吳芮國高牙遙帶豫章城

樓船王氣依然在千載能忘擊楫情

歲暮和文壽承

歲盡飛鴻不到家尚將長缺在天涯呼盧且醉咸陽酒
騎馬頻看上苑花白首校讐成寂寞金門留滯愧清華
廣文不道官如水彩筆分行奪錦霞

除夕

風雪寒宵欲變春短檠孤榻自相親久辭滄海思垂釣
一卧金門忝侍臣青玉燈烟遙拂曙銅駝衣馬暗生塵

更聞未敢停雙管漢殿迎年事事新

甲子元旦早朝

劍舄翩翩起玉塵相風微轉應芳辰璣衡共覩成文麗
鳳鳥重經紀歷新鸞輅青旂回獻歲朱絃疏越奏陽春
漢酺萬國皆懽慶瑶水年年預從臣

答助甫

楚客登樓賦不成四愁知爾有詩情才人久未還宣室
明主今猶問廣平風雪夜回千里棹鴈鴻春送五雲聲

相思暫把薜蘿草早晚瀟湘計去程

頃以俚述投大司馬白石蔡公猥承見答次韻一

首

十年華省夢清芬喜挹風流在五雲司馬舊曾傳諫草
侯芭元自好玄文斗間一望雙龍氣臺上誰攀彩鳳羣
莫擬北山招隱士更開東閣奉明君

杜舍人從殷移居同約卿楨伯過訊

青雲已忝同時彥不謂城南更卜鄰情似綈袍還借問

興緣蘿薜故相親才名天祿誰中尉詞學樊川況舍人
臺上早鳴燕腰裏漁樵吾欲乞聞身

送光祿卿李廷守請告還縉雲省觀

燕雪初融畫舫開青門相送酒頻催衣冠世及逢昭代
劍佩班聯自上台綵服況持金虎節黃封偏在紫鸞杯
白頭想問東方朔海上仙桃熟幾回

送客憩萬福菴題雲山方丈壁

花宮高倚五雲邊解帶來叅丈室禪趺坐祇留雙跡在

入門誰續一燈傳春風漸着燕臺柳歸思深懸下瀝田
還與遠師成暫憩東林攜手是何年

曾都尉子澄自吳中至止近關以詩見寄奉答

短服誰從灞上過楊花春暮一悲歌豈緣薏苡拋金印
還逐鷗夷卧釣簑汝水解歸憐許靖鴈門將老念廉頗
漢庭執戟慙虛簿手把瑤華奈爾何

送林維承之邵陽

秋風怨別在京華楚澤前期萬里賒落木遙臨洞庭水

深山時有晉人家烽烟絡繹猶傳檄井邑蕭條可種花
撫字故應煩令尹不同王粲滯天涯

送吳太僕公路之留都

金貂清切近三台招駿應煩楚甸來湯沐山川王氣在
烟花樓閣大江開旌旗實重談兵地林壑偏宜作賦才
諫獵有書明主識栢梁歸日肯遲回

送楊參軍允恭守曲靖

冠蓋中朝第一流佩符還入楚鄉遊銅駝夜月淹燕甸

金馬春風夢益州槃木漫勞通貢篚硯房今喜息戈矛
淮陽豈是煩長孺白羽曾參幕府籌

張司理羽王將之雷陽携酒見過招姚元白蘇子

川吳化卿歐楨伯黃定甫同集

桂水飄零作賦才祇今東閣為誰開宦情肯厭蓮花府
離思難禁竹葉杯青玉共看燎火近紫關猶阻捷書來
清歌戀賞俱詞客江海能無遠夢迴

送別張羽王

歲晏難為遠別心
況逢霜雪易霑襟
豪遊定有張融賦
遠使非緣陸賈金
傾盖風流成寂寞
積薪時事任浮沉
思君驛路梅花發
能訪茆堂在漢陰

答王亮卿

谷口曾聞隱士名
瑤華相憶在江城
五陵車馬已削迹
十岳排雲空寄情
倦客久思蓴菜美
滄洲終鬱紫芝榮
關門正擬傳書去
知爾排風羽翼成

寄懷許僕丞元復

作吏兼無簿領勞華陽仙掾夙稱豪捐金此日求龍種
聯句誰能對馬曹蠟屐近尋幽谷賞木瓢遙取釀泉濤
風塵愁絕難乘興雪滿長淮白浪高

同鄺別駕中伯蔡山人子畊幼子邦理登九成臺
芙蓉山色半晴陰影入空江百尺深紫閣倒垂星宿夜
碧天吹落鳳鸞音烽塵正屬談兵日雲路難為出世心
風景故園猶想像丹梯吾肯倦登臨

小歲劉觀察招飲籌遠堂

柳營吹角過良宵雪袖還從席上飄
南省詩名論水部
北門勲業待嫖姚
驚心歲月頻更燭
回首鄉園一頌椒
策馬揮戈憐此地
佩環曾奉紫宸朝

經韶石聞汝源報捷志喜

離家已是過新年夢裏山川尚儼然
北闕烟花隨玉輦
南溟波浪罷戈船
人非陸賈曾遊說
地有珠崖莫棄捐
止輦上書勞聖主
乞歸吾欲種春田

九日謁舜廟

仙馭曾留桂樹叢冠裳肅穆儼升中地盤五嶺朝衡岳
城闕雙流遶閼宮蘋藻馨香猶楚俗山川渟渚有虞風
嚴趨正憶羣龍會王氣燕臺倍鬱葱

同姚元白吳化卿歐楨伯登毘盧閣

禁城殘日漸棲烏傑閣高憑見帝都霜外白榆連睥睨
雲中金刹擁浮圖南來書札還看雁北望風塵欲射烏
落葉可堪成聚散新豐那惜酒頻沽

清明日謁孝陵

燎烟午夜徹明樓玉佩追趨拜委裘白水河山留帝宅
蒼梧雲氣想宸遊松枝下拂金鋪暝澗道深還碧殿流
誰羨大風思猛士萬年豐邑戴詒謀

遊靈谷寺

門遶黃山路不賒青松迴匝見丹霞禪河六月猶飛雪
空谷千年自雨花雲氣遠移金剎動竹陰清入畫廊斜
十行賜札留初地老衲相逢說翠華

春望

迴鴈高飛隔上林春城凝望欲霑襟黃塵趨走餘孤劍
白首遭逢祇寸心淮海鶯花初爛熳長安車騎幾升沉
章華遠道非遊豫早事春田下玉音

少江為黃叅軍錫之作

少江者黃君叅軍錫之別號也嶺外諸水如湏
水湟川武溪貪泉皆名川匯衆流以入于海若
潯陽之九江然越人名之為九江錫之尊人毅
齋公以名進士起家官至南京太常寺卿常居

其地比謝事歸築室以逸老且遺其後之人曰
吾之寢丘也鄉之人咸重公風節稱為九江公
云君克堂構屢試不偶乃貢入大學讀書論藝
其中朋好亦輒以少江稱君蓋比之元方慈明
之流也君仕為建安叅軍雅非其好間以使事
至金陵屬予為曹郎過從甚暱且言曰予仕不
得志有先人之敝廬在行歸于江上與漁樵為
侶時樹藝封植俾故業不隕墜足矣安能役役

徇人之耳目哉非子無知予心者予久滯羈旅
即欲拂衣從君遊予慙慙不已為之賦此君獲
解纓磅礴茲丘能以翠翰之舟相逆於滄浪之
上耶予固願從君遊矣

仙源近與海潮通還有幽亭碧浪中謝客石門

闕

黃金臺上見新詩，傾蓋相逢慰所思。
洛下才名誰並美，竹林風致似前時。
心懸北闕先春到，書寄家鄉有鴈知。
寥落草堂虛月色，梅花江路與君期。

牛首寺

名山為闕幾千年，楚蜀山川在目前。
珠火夜明蕭帝塔，石林秋隱辟支禪。
花房却燭機纔息，紫閣攀蘿意欲仙。
一下白雲心未已，最憐身世在西天。

送李伯承還山

黃塵拂衣歸去來
酣歌擊筑相徘徊
青山似惜敬亭別
明月況有金陵杯
煙中柳條折欲盡
池上浮萍吹復開
楚江渺然挂席去
知爾萬里遊蓬萊

秋風嫋嫋吹素襟
別酒離情誰淺深
黃金豈辦久客計
白日不照孤臣心
吳姬送君柳花店
越人自歌山木吟
烟波回首一相失
幾時瑤華能惠音

東喬精舍為鄭于業賦

谷口誰知隱士踪
家聲猶是鄭司農
心情久已隨麋鹿

名姓何須擬卧龍北戶日高無客款西林春暖有雲封
青童白鶴相携處不遣閒人采藥逢

同陳道襄憲使諸君集清泉精舍

衡門還枕碧山栖溽暑初銷信杖藜天外白雲團作扇
雨中黃葉下成蹊疎鐘入夜東林靜遠樹生烟北垞迷
不有風流同小阮玉壺誰為使君携

冠退即事

戰罷樓船日已曛城中不見捷書聞誰家羌笛哀明月

幾處漁歌散暮雲短服佯狂空說劍文身無賴豈能軍
朱厓銅柱俱王土瀕洞年來盡海氛

兵後同唐寅仲酌借讀軒因寄懷潘少承

鸛鵲一夜起潢池江上人家避亂移橘柚豈能供井稅
蛟龍難遣怯舟師漢庭推轂今虛切閩海援兵事可疑
風雨開尊重憶汝琴書何處逐鴟夷

潘少承至同唐寅仲陳忠甫過訊留酌舟中

故園兵後阻相酬乘興能來慰我愁花竹漸蕪因避地

江山無恙復移舟
赤闌迴合垂楊暮
白屋蕭條野水流
諸將崑崙如早下
持竿吾欲卧滄洲

梁思伯自楚使回以故人徐子與張助甫詩帙見
示感賦

曾從君王幸上林
風塵回首隔同心
燕臺自築黃金館
郢國誰傳白雪音
清世名高翻見逐
孤臣身遠莫霑襟
扁舟不少江湖興
應擬逢迎在漢陰

答張參知留別之作

扁舟南下意遲遲，忽復西遊嘆路歧。
久客蠻中愁毒熱，將還宣室有佳期。
交懽正憶風塵際，戎馬深憐去住時。
此後音書倍難寄，楚雲燕鴈各參差。

喜鄺中伯解官東歸

石門精舍喜新營，為政應傳鄴下名。
楚醴初辭王傅日，越吟終有故鄉情。
歸心正值黃花發，世路那堪白髮生。
知是督郵君懶見，相逢先問水雲程。

瑤石山人稿卷十一